

## Za besplatne udžbenike Tuzlanskom kantonu 112.000 KM

Federalno ministarstvo obrazovanja i nauke potpisalo je u ponedjeljak u Mostaru ugovore o finansiranju nabavke besplatnih udžbenika s kantonalnim ministarstvima obrazovanja u Federaciji Bosne i Hercegovine, za što je u budžetu za ovu godinu osiguralo 560 hiljada maraka.

Kantonalna ministarstva dužna su nabaviti pripadajući broj kompleta udžbenika za kategoriju najugroženijih učenika u stanju socijalne potrebe koji pohađaju peti razred devetogodišnjeg osnovnog obrazovanja, a na osnovu vlastitih evidencija o učenicima u stanju socijalne potrebe ili evidencija, odnosno podataka prikupljenih od strane svih osnovnih škola s područja svog kantona, i to najkasnije sedam dana prije početak školske 2018/2019. godine, naveli su iz Federalnog ministarstva obrazovanja.

Udžbenike su dužni nabaviti od ovlaštenih izdavačkih kuća s područja BiH i oni, izuzev udžbenika stranih jezika, trebaju biti štampani u BiH. Također, ukoliko neko ministarstvo, iz bilo kojih razloga, ne realizira nabavku udžbenika, obavezno je izvršiti povrat sredstava.

Inače, na osnovu svih podataka i pokazatelja, Federalno ministarstvo obrazovanja i nauke sačinilo je Prijedlog raspodjele sredstava za nabavku besplatnih udžbenika, i to: Unsko-sanski kanton 70 280 maraka, Posavski 9 800 maraka, Tuzlanski 112 000 maraka, Zeničko-dobojski 93 240 maraka, Bosansko-podrinjski 8 400 maraka, Srednjobosanski 63 280 maraka, Hercegovačko-neretvanski 50 960 maraka, Zapadnohercegovački 23 800 maraka, Kanton Sarajevo 109 200 maraka i Hercegbosanski kanton 19 040 maraka.

U proteklom trogodišnjem periodu Ministarstvo je za realiziranje nabavke besplatnih udžbenika izdvojilo 1 850 000 maraka, a u okviru ovog projekta omogućeno je 276.244 besplatnih udžbenika za 43.178 učenika.

Cilj je da se svakom djetetu omoguće približno isti uvjeti za sticanje znanja, odnosno stvore kvalitetniji uvjeti za odgoj i obrazovanje djece u Federaciji Bosne i Hercegovine, stoji u saopćenju. (f, tl)

60

SHARES

[Share on Facebook](#)

[Tweet](#)

[Follow us](#)

[Share](#)

[Share](#)

[Share](#)

[Share](#)

[Share](#)

Date: 23-04-2018